



UPA 2014/165
04.06.2014
KL

Nunaqarfinni illoqarfinnilu isorliunerusuni ineqarniarnikkut pissutsit ilungersunartut qaangerniarlugit illunik nutaanik kiisalu aserfallassimasunik nutarterinissamik anguniaqarluni suliaqartoqarnissaa pillugu apeqqu-teqaat aallaavigalugu oqallinnissamik siunnersuut.

(Inatsisartunut ilaasortaq Hans Enoksen, Partii Naleraq)

Inatsisartunut Ilaasortaq, Hans Enoksen, Partii Naleraq, isumaqatigaarput ajornartorsiutit aaqinneqartariaqartut pillugit oqallinnissamik siunnersuutaanut.

Nunatta siammasissumik najugaqarfigineqarnera pimoorullugu illersorutsigu attanniarutsigulu, najugaqarfitsigut aaqqiissutaassussamik iliuseqarnissaa saneqqunneqarsinnaangilaq.

Nunatta sineriaa angallavigigaanni ersarippoq, najugaqarfiit amerlaqisut qanoq nungullarsimatigisut atugassaqarfiunermikkullu ullutsinnut qanoq naleqqukkunnaarsimatigisut.

Taama inissisimasoqarnera ilaatigut kinguneqarpoq, inuit sumiiffinnut allanut nuuttalersimanagerannik tikiffigisaminnilu inissarsioortunut ilaalernermikkut inissaaleqiffiunermut ilasaataalersimallutik.

Nunaqarfinni illoqarfinnilu amerlanerpaanni illutaarsinnaanermut aningaasaleeriaatsinik periarfissaqannginnera patsisigalugu nunatta najugaqarfigineqarnermigut ineriartornera imminut nammaqatigiinngitsumik ingerlalnernikuuvoq, ajornartorsiutinillu arlalinnik pilersoqarneranut aallaaviusunik.

Ajornartorsiut oqallisigineqartoq Naalakkersuinikkut isummerfiginiaraanni siullermik aalajangiunneqartariaqarsoraarput nunatta najugaqarfigineqarnera qanoq ittoq siunissami siunnerfiussanersoq.

Ineriartorsimaneq uagut qinikkatut nammineerluta akisussaaqqataaffigisarput takutitsivoq, nunaqarfiit illoqarfiillu ilaat inuerukkiartuinnartut naak tamanna naalakkersuinikkut siunertaangitsoq oqaatigisaraluaripput.

Aalajangiusimagutsigu nunaqarfiit illoqarfiillu inuussutissarsiornikkut siunissaqarfiusut ullutsinnut naleqquttumik atugassaqarfiussasut, taava pisariaqarpoq ullumikkorniit allaasumik periuseqarnissarput.

Illoqarnikkummi naammaginartumik atugaqarsinnaanneq aallaavioqataavippoq sumiiffinni najugaqarusussutsimut, najugaqavissuinnaat kisiisa eqqarsaatiginagit kisianni aamma allamiit tikillutik sulisussat pisariaqartinneqartartut eqqarsaatigalugit.

Boligstøtte-toqqap periarfissaqarfiunikuunerata saniatigut Illorput 2000 assigisaallu iluaqutaasimagaluarlutik, ajornartorsiummut tamakkiissumik aaqqiissutaassimangillat. 10-40-50-mik periarfissaqartitsinikuunerit illoqarfinnut aalajangersimasunut atugassiatut sanaajusut aamma killilimmik iluaqusiisimapput.

Illuliornermi aningaasanik attartorfiusartut, kreditforening-it, illoqarfinnut anginernut sisamanut qjarunnaqisut nunap sinneranut akulerukkusunnginnerat iliuuseqarnissatsinnik pisussaaffiliivoq.

Uagut isumaqarpugut inuiaqatigiit pisariaqartitsinerannik aallaavilimmik nunatta ineriartornera ingerlasariaqartoq. Inuiaqatigiit pisariaqartippassuk nunatta siammasissumik inuuffiunissaa taava qanoq iliuuseqartariaqalerpoq.

Inuit Ataqaqatigiinni isumaqarpugut, siammasissumik inuuffeqariaaseqarnerput pisuussutitta ilagigaat periarfissaqarfiatigut illersorneqartariaqartoq.

Taamaammat Namminersorlutik Oqartussat pisussaaffeqarput, nunarpummi tamarmi imminut pisariaqarfigeqatigiimmat, aningaaseriviit sinnerlugit illuliornianut aaqqiissuteqarnissaminut, soorunami aningaaserivinniit piumasarineqartartut nalinginnaassut periaaseqaqatigalugit.

Periarfissarissaarfiusuni inuussutissarsiutitigut inerisaasoqartariaqarmat, inunnut atugassarititaasut tamakkiissumik aamma malinnaatsinneqartariaqarput.

Aningaaseriviit illuinnaassiornerat soorunami uggornarpoq sineriammi sumiluunniit inuussutissarsiutinut tapersersuiniarlutik takoqqusaartarmata pisariaqarnerpaanullu tunuarsimaarfeqarlutik.